



做牙

早前社會的生理人，攞會佇咱人初二、十六做牙拜拜，煮一寡有油臊的好料理來巴結工人恰辛勞。毋過彼陣的頭家人是向望家己會當趁大錢，才會攢牲禮拜土地公恰老大公，欲求平安順序，姑不將才按呢做的，啊無，盍有遐爾仔好死，欲予下跤手人食好料理咧？

頭家人規頭殼攞咧想錢，見著銀票仔，目睷就展大蕊。毋過，伊若看著神、碰著鬼的時，全款跤手肉慄慄掣，驚甲強欲半小死。毋才講做牙是傍鬼恰神的福氣，才有通食魚食肉、淋燒酒。頭家若虬、儉，閣無神、無鬼，啥物攞毋驚的時陣，這聲就無「牙」通做，無腥臊通食矣。好佳哉，佇五十冬前的臺灣猶毋捌聽講有這頭家出現過。

做牙彼工的透早，頭家會喊煮飯仔去菜市仔買魚魚肉肉轉來。拜拜的三牲有腿庫、雞鶕仔、大尾魚仔，用三塊桶盤分開貯，閣煮一鼎大麵，內底摻肉絲、蝦卑仔、香菇，頂面捫一寡真芳的香油，干焦鼻著，就強欲流瀾。另外，會恰幾項仔菜，比論講：冬粉煮卵湯、韭菜花炒小管、麻竹筍焢排骨，嘛是讚甲死無人的好料理。

拄好過晝的時陣，煮飯仔共物件排起去門喙的桌仔頂，才請頭家來拜拜。未拜的進前，頭家的目睷展甲金爍爍，對桌邊撻一輾轉透，斟酌看有豐沛無？心肝內順繼咧算煮飯仔所申領的錢額，到底是買著啥物碗糕料理？有合無？有暗崁無？

頭家人仔擲香做頭前，工人倚佇尻川後，同齊綴拜。圍佇邊仔枹甲大腸告小腸的囡仔，毋是欲看人按怎拜土地公伯仔，顛倒是對桌頂的好料理咧注神，心肝咧想的是：「香盞會過遐慢咧？」

聽候太白酒敬過三擺了後，煮飯仔共咧欲齊過的香跤總摸起來，拞去恰金紙做一伙燒掉的時陣，頭家會閣行出來用手拜拜，按呢就煞矣。煮飯仔綴手共三牲揀入去灶跤切開，另外用盤仔貯。未揀出來進前，頭家、辛勞全用倚的，早都圍咧桌邊，先貯大麵配桌頂的菜。大人、囡仔二、三十雙箸、碗恰湯匙仔，袂輸枹飢失頓按呢，食甲強欲共桌仔反過。

作者：藍春瑞

☆詞彙學習☆

【油臊】iû-tsho：雞、鴨、魚肉等含油脂的葷腥食物。

【啊無】ah-bô：要不然。

【半小死】puànn-sió-sí：半死。

【腿庫】thuí-khòo：豬蹄膀。

【桶盤】tháng-puànn：托盤。

【香油】hiang-iû：白芝麻油。

【過晝】kuè-tàu：午後。

【申領】sin-niá：請領。

【暗崁】àm-khàm：私藏；私吞（財物）。

【大腸告小腸】tuā-tîng kò sió-tîng：戲稱肚子很餓。

【注神】tsù-sîn：全神灌注。

【香跤】hiunn-kha：香燒完殘餘的竹枝。

【枹飢失頓】iau-ki-sit-tîng：三餐不繼。

☆文法學習☆

【……死無人】當補語，用來強調形容詞的程度。文內「……讚甲死無人」是「好吃到無與倫比」的意思。